

CAÇA CHE DIRUN SAN PA_BLO ADIVE, DECHUH YE YAHN IHYAN YAHN DENDIOHS CHE VATE YE YA_N CORINTO

1 ¹U Pa_blo, che tendahnun Dendiohs u che ndi apóstol yahn Dihvo vo Jesucristo ne, dirún caça cuh nduco dihno vo Timoteo, dechuh nuhn yahn nchuhn, ihyan yahn Dendiohs che vate ne ya_n Corinto ma_n, numachahte ya_n yahn Acaya ma_n. ²Chido vo Dendiohs ma_n, Dihvo vo Jesucristo ma_n, din yahino ye nchuhn, din ye che ndahca cuahtenan ne.

Nduhca che chuhrihn Pa_blo

³Ndeva vo yavena_n Dendiohs, Chida Dihvo vo Jesucristo, ihyan min che yahino ye uvo ma_n, renecah ya_n ye chedave yuhn vo ma_n. ⁴Cuahn che yah rahno nuhn ne, a ihyan min che renecah ya_n ye chedave yahn nuhn. Tihca redin ye, ca_a che, nduhca che renecah ya_n ye chedave yahn nuhn ne, tihca co necah ya_n nuhn chedave yahn ihyan che yah rahno ye. ⁵Co necah ya_n nuhn chedave yahn ye, te nduhca che a_ma rechuhrihn ma_n nuhn na_hn cua_n, yahn che ritahno nuhn Dihvo vo Jesucristo ne, tihca rete ndahva ye vedechahtino yahn nuhn, retihyon yune ye nuhn che necah nuhn vedechahtino ihyan chena_hn. ⁶Na_n rechuhrihn nuhn ma_n, na_n renda_a nuhn vedechahtino ma_n, chemin ne, ca_a che

ndāca yune che necāh yān ne chedave yahn ne, ndevahn ne. Cuahn che chuhrihn ne nduhcā che rechuhrihn nuhn ne, co ndāca ne vedechahtino, cocha ne. ⁷Hua dehve rahco nuhn, te a devano nuhn te cuahn che rechuhrihn nchuhn nduhcā che rechuhrihn nuhn ne, namin rendāca ne vedechahtino nduhcā nuhn.

⁸Dihno nuhn, mān ne, nahn nuhn che cadino nchuhn nduhcā che āma chuhrihn nuhn min yāhn yahn Asia. Āma yah chahno nuhn nde a dihya nun ino nuhn chi. Co ametah ndevahn nuhn, che rahco nuhn. ⁹A chihco dāma ino nuhn nduhcā che rihco dāma ino ihyan che a devano ye che va che coh ye. Ate chichihve yahn nuhn cāva che ndotenan che cochahtino nuhn mān nuhn ne, cochahtino nuhn Dendiohs, ihyan min che rendedetuhche ye tenāhn. ¹⁰A ihyan min che ndedevahn ye nuhn ro min che a vate nuhn tāh vederih. Riquendi ye rendedevahn ye nuhn nde meniyan, ne chenan ino nuhn ihyan che ndedevahn ye nuhn caviyān deman. ¹¹Nahn che covāh nchuhn mān, covāh āma yāhn dihno vo mān, cāva che conan Dendiohs nuhn. Tuhme tumacadino āma yāhn ihyan che yahino Dendiohs nuhn, ne necāh ye nundihve cuahn ihyan.

Rahn Pablo deh cuande che hua ndā nun ye yān Corinto

¹²Yeno nuhn che hua o nān o chende nuhn mān, che runecāde chahtechica nuhn nān ihyan nunde mān, menān vihca nān nchuhn mān. Chi chahtechica nuhn tihcā, te chinan Dendiohs nuhn. Ndiyu nduco vededevano yahn mān nuhn che tihcā din nuhn, te a Dendiohs che chinan ye nuhn. ¹³⁻¹⁴Hua o nān o chende nuhn, te nducuahn che redirun nuhn yahn ne ne, numa cuāco, ne a mān ne conahn ne ura che ndihchenan ne. Nduhcā che a renahn ne tah ne, chenan ino nuhn che conan conahn ndah ne, cāva che cuahn che ndaconan chi tun Dihvo vo Jesucristo ne, co yeno nuhn cāva nchuhn, ne namin nchuhn ne, co yeno ne cāva nuhn.

¹⁵⁻¹⁶Nducote a devanó che renevahnecun nchuhn u ne, chihco cadé che cuahn che cāhn yāhn yahn Macedonia ne, dinoca nchuhn, chúh quendihcheró nchuhn, cāva che cuahn che ndaconán ne, co o yune quendihcheró nchuhn. Tuhme conan nchuhn u che cāhn yāhn yahn Judea. ¹⁷Andahre hua

chi nduhcá che chihco cādé, ate hua co cahma nchuhn che o ndudo dín, nde huane che ndi ninó costumbre min. ¹⁸A devano cuāco Dendiohs te nuhn ne, hua o ndudo redin nuhn nan nchuhn, ¹⁹te u man, Silas man, Timoteo man, cahndudo nuhn ndudo yahn Dihvo vo Jesucristo, ihyan min che Daya Dendiohs. Ihyan min ne, ama ndudo redin no ye, riquendāh cuāco nducuahn che rāhn ye. ²⁰Cuāco ndudo yahn ye, te redin ye che rinahn nducuahn ndudo che chihco cāde Dendiohs. Chemin che cuahn che rendeva vo yavenan Dendiohs che cuande yahn vederihquentiyon yahn ihyan min ne, rihco ro vo che yeno vo che ndāhcā redinahn ye. ²¹A Dendiohs che tendāhnun ye uvo, ne redin ye che riquendi vo numa ino vo ritahno vo Dihvo vo Jesucristo. ²²Man ye chihco vih ye uvo, nedin yahn ye uvo. Namin dín ye che quenun Vaco Ndah yahn ye uvo, chihco ro ye che ndeva ye uvo.

²³Yahn che renan vahinó nchuhn ne, chemin che quenan rino cá che metah chí yan vāco ne. Nde muhn nde nan Dendiohs ne, cuāco che rāhn. ²⁴Nuhn ne, ndiyu che nahn cahcantiyon nuhn nchuhn nan che ritahno ne Dihvo vo Jesucristo, te a ritahno ne ihyan numa ino ne. Che redin nuhn ne, che rinan nuhn nchuhn cava che tahque co yeno ne.

2 ¹Chihco dama inó che hua chi nún yan vāco nchuhn, te a devanó te ndete che chi nún ne, va che dín castigo nchuhn, co ran ne. ²Ndete che dín che co ran ne, nducote a nchuhn che va che dín ne che co yenó ne, hua codin ne, yahn che ran ne. ³Chemin che tahque ndah ne, dirun nó yahn nchuhn cava che, ndotenan che dín ne che co ran ne, dín ne che co yenó, te a devano cuācó te ndete che co yenó, namin nchuhn ne, co yeno ne. ⁴Hua náhn che co ran ne, ne chemin che cuahn che dirún yahn ne ne, ama chi ndaché che ndedecadinó cava ne, nde chacó, te náhn che tumacadino ne che ama yahinó nchuhn.

Nchahco Pablo yahn ama sahn che nto ino se nunde yahn se

⁵Me sahn che quendihco nunde me ne, dín se che chi ran vo. Ate che lado yáhn ne, anduhnecā ndete che nde hua chí ran. A nchuhn no che chi ran ne tah. Tihcā rāhn, te hua náhn che a ama yune decuihta nduh vo nunde yahn se. ⁶A ndo dama nducoyaca nchuhn, dín ne castigo sahn, ne nduco chemin ne,

a va. ⁷Man ne, tahque ndah che nchahco nchuhn yahn se, necah yan ne chedave yahn se, che co che cuacondah vedame ne sahn, cava che hua chuhnan cuahn co ndache se. ⁸Chemin che ricá favor nchuhn che ndaconan ne ndo yan ne nduco se, din yahino ne sahn. ⁹Dirún yahn nchuhn menan cava che techecade ne yahn sahn min, te nahn ndihchenán nchuhn ndete che renevahnecon ne che rihquentiyón. ¹⁰Adecoduhno ihyan che nchahco nchuhn yahn ye ne, namin u ne, nchahcó yahn ye. Me sahn min ne, ndiyu che ama quendihco se nunde nan, ate cava che ndah yahn nchuhn, numacuahn vederihquentiyon yahn Dihvo vo Jesucristo ne, a nchahcó yahn se. ¹¹Tihca va che din vo, te a devano vo te ama mayon chundah, quechica se rihncheh se, ne hua ndahca che cah yune vo che din duche yahn se uvo.

Ama ndedecadino Pablo, nda ye yan Troas

¹²Cuahn che nda yan Troas cava che cuahndudó ndudo ndah yahn Dihvo vo Jesucristo ne, andahre ama ndahca cava che din ntiyon yahn ye min, ¹³ate nducote hua ntaca dihno vo Tito ne, hua chihndeman inó. Chemin che chihcoman dihno vo che vate ye min, ne cuahn yan yahn Macedonia.

Dendiohs ne, renech yan ye chedave yahn ihyan che ritahno ye Dihvo vo Jesucristo

¹⁴Ndeva vo yavenan Dendiohs, ihyan min che cuahn dama renech yan ye chedave yuhn vo yahn che ritahno vo Dihvo vo Jesucristo, ne retihyon yune ye uvo che racotuhn vo ndudo ndah yahn ye numachahte. ¹⁵Nuhn ne, rahndudo nuhn ndudo ndah yahn Dihvo vo Jesucristo. Ntiyon min ne, anduhneca yade yahn nanda che ama ndah ran. Ama quenan ino Dendiohs, ne retuhn van ihyan che ndevahn ye man, van ihyan che conda ye man. ¹⁶Ihyan che ritahno ye ndudo min ne, retumacadino ye che ndevahn ye, ne ihyan che hua ritahno ye ne, retumacadino ye che va che conda ye. ¿A devano nchuhn duh che quendah ndah nan ntiyon min ne? ¹⁷Quendah ndah nuhn, te hua retihdenan nuhn vededevano yahn man nuhn nan ndudo yahn Dendiohs, nduhca che redin ama yahn ihyan. A Dendiohs che tendahnun ye nuhn, ne rahndudo nuhn ndudo yahn ye numa cuaco, redinahn nuhn che rihquentiyon Dihvo vo Jesucristo.

***Ndudo ndah yahn Dendiohs che ndahco cade
ye, ndahco ye tah Dihvo vo Jesucristo***

3 ¹Che tihca dirun ne, co riquendi nchuhn rendedecadino ne che rendeva man yavenan nuhn, ate hua. Hua rendotenan nuhn che dechuh ihyan caca yahn nchuhn cava che conan ne nuhn, nde huane che dechuh man ne caca yahn ihyan cava che conan ye nuhn, andahre tihca va che din nah ihyan, ndotenan ye ama caca che cahma nan ihyan cava che ndaca ntiyon din ye. ²Nchuhn ne, anduhneca ama caca che chenan cuma nuhn cava che cahma nan nuhn. Che rendihchero ihyan nchuhn man, che recadino ye yahn ne man ne, retumacadino nducoyaca ye che a Dendiohs che te ye ntiyon che redin nuhn. ³A ndedevahn Dihvo vo Jesucristo nchuhn, chitahno ne ndudo ndah yahn ye che cahndudo nuhn. Dendiohs, ihyan min che va ye vahchetero ne, numacuahn vederihquentiyon yahn Vaco Ndah yahn ye ndedevahn ye nchuhn, ne vederihquentiyon che ndevahn ne ne, tahque chahte che co vederihquentiyon yahn ley che ndirun nan tu rahno, che ndahco Dendiohs tah Moisés.

⁴Nduhca che chenan ino nuhn Dendiohs numacuahn vederihquentiyon yahn Dihvo vo Jesucristo ne, a devano cuaco nuhn che conahn ntiyon che redin nuhn yahn ye. ⁵Ndiyu vededevano yahn man nuhn richahtino nuhn, cava che co din nuhn ntiyon yahn ye, te richahtino nuhn che a man ye rinan ye nuhn. ⁶Tihca, te a ihyan min che rete ye vededevano yahn ye nuhn, cava che co cuhnde tah nuhn vederihquentiyon ra yahn ye, cuahndudo nuhn ndudo ndah yahn Dihvo vo Jesucristo. Ndiyu ley che a ndirun che dito yahn vederihquentiyon min, te Vaco Ndah yahn Dendiohs che dito yahn. Ley che a ndirun ne, atenan che rihco ro che va che conda ihyan nunde, ate Vaco Ndah yahn Dendiohs ne, redin che cuahtenan ihyan vahchetero numacuahn ro.

⁷Ley che ndirun nan tu rahno, che rihco ro che va che conda ihyan nunde ne, chihco cade Dendiohs che cuihno vederihquentiyon yahn, hua quendi cuahn dama. Andahre ama yudo vederihquentiyon yahn ley min, che nde nan Moisés ama diyahn ro, nde hua ri che ndihchero ihyan naci6n yahn Israel, ⁸ate nde tahque yudo vederihquentiyon

yahn Vaco Ndah yahn Dendiohs. ⁹Vederihquentiyon yahn ley min, che rihco ro che va che conda ihyan nunde ne, ama yudo, ate tahque yudo vederihquentiyon yahn ndudo ndah yahn Dihvo vo Jesucristo, che rendedevahn ihyan.

¹⁰Nducote tahque yudo vederihquentiyon yahn ndudo ndah yahn Dihvo vo Jesucristo ne, anduhneca ndete che a chihno vederihquentiyon yahn ley min. ¹¹Tihca, te ley min che va che cuihno vederihquentiyon yahn ne, andahre ama yudo, ate tahque yudo vederihquentiyon yahn ndudo ndah yahn Dihvo vo Jesucristo, che hua nda ro che cuihno.

¹²Nducote a devano nuhn che tahque yudo vederihquentiyon yahn ndudo ndah yahn Dihvo vo Jesucristo ne, chemin che rahndudo nuhn numa ino nuhn. ¹³Ametah nde ama nan che tihyon ndeh nuhn nduhca che din Moisés, che chendih ye ama tino nan ye, cava che hua ndihchero ihyan naci3n yahn Israel nduhca che rino rino ravi che diyahn ro nan ye. ¹⁴Rahndudo nuhn ndudo yahn Dendiohs nduco cudado, cava che conahn ihyan. Ate ihyan naci3n yahn Israel ne, nde meniyon hua renahn ye yahn vederihquentiyon ndico, anduhneca ndete che va che redin vahche yahn ye, te atenan che cotahno ye Dihvo vo Jesucristo, tuhme conahn ye. ¹⁵Namin nde meniyon cuahn che rahndudo ihyan ndudo che dirun Moisés ne, anduhneca ndete che va che redin vahche yahn ye, hua renahn ye. ¹⁶Ate cuahn che cotahno ihyan Dihvo vo Jesucristo ne, tuhme conahn ye, cuavi che redin vahche yahn ye. ¹⁷Dihvo vo Jesucristo ne, anduhneca Vaco Ndah yahn Dendiohs ihyan, ne ihyan che quenun Vaco Ndah yahn Dendiohs ihyan ne, dihn va chedave yahn ye nan ley che dirun Moisés. ¹⁸Chemin che nducoyaco vo che ritahno vo ihyan min ne, nducote ametah deh che redin vahche yuhn vo ne, rihco ro vo che ama yudo vederihquentiyon yahn ye. Ro ro ne, rendo vo nduhca man ye, redin Vaco Ndah yahn Dendiohs che tahque rahtenan cumo vo vederihquentiyon yahn ye.

4 ¹Nducote man Dendiohs yahino ye nuhn, ne chihco ye vederihquentiyon tah nuhn che cuahndudo nuhn ndudo ndah yahn Dihvo vo Jesucristo ne, chemin che riquendi nuhn numa ino nuhn redinahn nuhn. ²Hua chihnga redin nuhn man, hua rihtera nuhn vedecuihno yahn nuhn man, hua rihncneh nuhn man, hua retihdenan nuhn vededevano yahn

mān nuhn nān Ndudo yahn Dendiohs mān. Tahque ndah ne, rahndudo nuhn demān ndudo cuaço, ne nduco tihçā rihco ro nuhn che runecađe nuhn nān Dendiohs. ³Ate ihyan che va che conda ye ne, a ihyan chahn che hua renahn ye ndudo ndah yahn Dihvo vo Jesucristo che rahndudo nuhn. ⁴Hua ritahno ye, te a chihncheh chundah ihyan, din se che hua co conahn ye vederihquentiyon chahte yahn ndudo ndah yahn Dihvo vo Jesucristo, ihyan min che ndihchero ihyan iyehanse ihyan, tumacadino ye taça Dendiohs. ⁵Hua rahndudo nuhn çava che nevahnecun ihyan nuhn, te rahndudo nuhn çava che nevahnecun ye Dihvo vo Jesucristo. Redin nuhn cuande anduhneça ndete che mozo yahn nchuhn nuhn, yahn che yahino vo Dihvo vo nduco vih. ⁶Tihçā rahndudo nuhn, te Dendiohs, ihyan min che chihquentiyon ye che chiya dave ne, namin din ye che chenahn nuhn yahn vederihquentiyon yahn ye che ndihco ye taħ Dihvo vo Jesucristo.

Nduhçā che va che cuahtechica ihyan che ritahno ye Dihvo vo Jesucristo

⁷Vederihquentiyon chahte che va taħ nuhn, che rahndudo nuhn ndudo ndah yahn Dihvo vo Jesucristo ne, chemin ne, nduhçā āma vedecuihca, ate mān nuhn ne, nde hua rignonun chihve nuhn. Tihçā, çava che co ro che vederihquentiyon min ne, yahn Dendiohs, ndiyu yahn nuhn. ⁸Rechuhrihn nuhn, ate hua ri doh ino nuhn. Āma rededecadino nuhn, ate hua retehche ino nuhn. ⁹Āma redin tañ ihyan nduco nuhn, ate hua rihcomān Dendiohs nuhn. Vate nuhn taħ vederih, ate rendedevahn ye nuhn. ¹⁰Nduh cuān nān che vatechica nuhn ne, āma rechuhrihn nuhn nduhçā che chuhrihn Dihvo vo Jesucristo, çava che co ro che quenduche ye, rinduco ye nuhn. ¹¹Numanahn che chenān nuhn iyehanse ne, āma çahnda yahn nuhn, che nahn çahno ihyan nuhn, yahn che ritahno nuhn Dihvo vo Jesucristo, ne nduco chemin ne, rihnde ro che va ye çava nuhn. ¹²Cuahn ðama vate nuhn taħ vederih, ate cochihve yahn nchuhn çava che ndevahn ne.

¹³Nān Ndudo yahn Dendiohs ne, ndirun nduhçā che raħn āma ihyan: “Chitahnó Dendiohs, ne chemin che cahndudó ndudo yahn ye.” Riquendi nuhn yune yahn ihyan min, ritahno nuhn Dendiohs. Namin rahndudo nuhn ndudo yahn Dendiohs, ¹⁴te a devano cuaço

nuhn che ndedetuhche ye Dihvo vo Jesucristo van tenahn, ne cava Dihvo vo quenan cuma che ndedetuhche ye uvo, nedin dama ye uvo nan ye. ¹⁵Nducuah che rahno ri nuhn ne, a cava che ndah yahn nchuhn, cava che cuhnde ro vedeyahino yahn Dendiohs nduco nuhn, ne ama yahn ihyan necah ye nundihve cuahn ihyan man, ndeva ye yavenan ye man.

¹⁶Chemin che hua ri doh ino nuhn. Andahre ama ri cuno nuhn nan ntiyon yahn Dendiohs, ate man ye renecah dito ye chedave yahn nuhn ro ro. ¹⁷Hua ri doh ino nuhn, te che rechuhrihn nuhn man ro cuh ne, hua ngu cuahn dama. Tah ra chemin, te tahque ndahca cuahno nuhn cuahn che cuahtenan nuhn vahchetero numacuahn ro. ¹⁸Nducote tihca ne, hua retumacah nuhn dehtenduh che va iyehense cuh, te hua rengu. Tahque ndah ne, retumacah nuhn vederihquentiyan yahn Dendiohs, te chemin ne, hua nda ro che cuihno.

5 ¹Hua recah cudado uvo che rechuh rihn vo man ro cuh, te a devano cuaco vo che cuahn che ndaco vo iyehense cuh ne, ndeva Dendiohs uvo vahchetero nan che cuahtenan vo cuahn dama. ²Chemin che, numanahn che vato vo iyehense ne, rahcoran vo che nahn cuahtenan vo vahchetero. ³Cuahn che ndaco vo iyehense cuh ne, a va yan nan che cuahtenan vo. ⁴Numanahn che chenah vo iyehense cuh ne, rahcoran vo, ndiyu che nahn vo che coh vo, ate che nahn vo che ndacorun vo, cuahtenan vo vahchetero numacuahn ro. ⁵Yahn che cuahtenan vo vahchetero ne, man Dendiohs tihyon yune ye uvo, din ye che quenun Vaco Ndah yahn ye uvo, rihco ro ye che ndeva ye uvo.

⁶Chemin che richahtino vo cuahn dama. A devano vo te, numanahn che chenah vo iyehense ne, hua rendihchero vo Dihvo vo Jesucristo. ⁷Ate ritahno vo ihyan, riquendi vo yune yahn ye, andahre hua rendihchero vo ihyan. ⁸Ndichahtino vo ihyan, nde tuno nahn ndaco vo iyehense cava che cuahtenan vo nan ye. ⁹Chemin che a cuahtenan ca vo iyehense, o hua, redin nun ino vo runecade vatechico vo cava che yeno ye nduco vo. ¹⁰Tihca, te va che ndo dama nducoyaco vo, techecade Dihvo vo Jesucristo yuhn vo. Ro min ndahco menun ye yahn queri amo vo, a ndah, o hua ndah, din vo, chahtenan vo iyehense.

Vederihquentiyan che ndevahn ihyan

¹¹Nducote renevahneacun nuhn Dihvo vo Jesucristo ne, chemin che redin nun ino nuhn riyahve nuhn ihyan nunde,

çava che cotahno ye ihyan. Dendiohs ne, a devano ndah ye che runecade vatechica nuhn, ne rahcó te namin nchuhn ne, a devano ne. ¹²Che dirún tihça ne, co riquendi nchuhn rendedecadino ne che rendeva mán yavenan nuhn nduhça che rahn ihyan yahn nuhn, ate hua. Che náhn ne, che co yeno nchuhn che runecade vatechica nuhn çava che hua co cuihnan ne, ndahconan ne yahn ihyan che ndere redin yade ye, redin ca ye che runecade ye. ¹³Nahn cuan ne, co rendedecadino ihyan che luco nuhn, ne nahn cuan ne, rendedecadino ye che runecade nuhn, ate hua dehve din yahn chemin, te redin nuhn ntiyon yahn Dendiohs, çava che ndah yahn nchuhn. ¹⁴Tihça, te nducote yahino Dihvo vo Jesucristo nuhn ne, chemin che renevahnecun nuhn che rihquentiyon ye. A devano nuhn te, nducote chih ye çava nducoyaca ihyan ne, nducoyaco vo ne, anduhneca ndete che chih vo dama nduco ye. ¹⁵Tihça chih ye çava che, uvo che ndedevahn ye uvo ne, hua cuahtechico vo vedeyeno yahn man vo. A ihyan min che chih ye, ne ntuche ye çavo vo, ne redin yahn che dinahn vo yahn ye. ¹⁶Chemin che nuhn ne, hua rendahchenan nuhn nde ama ihyan, tachan ihyan ye. Andahre ro menan ndahchenan nuhn Dihvo vo Jesucristo, ate man ne, ametah tihça redin nuhn. ¹⁷Tihça, te nducoyaco vo che ritahno vo Dihvo vo Jesucristo ne, a ndahcorun Dendiohs uvo, a ndo vo anduhneca ihyan ra. Nducuahñ vederendedecadino chihnga che chenancumo vo ro menan ne, a chihcoman vo. Man ne, a ndacorun vederendedecadino yuhn vo.

¹⁸A Dendiohs che din ye nducuahñ chemin, ndo yan ye nduco vo che cuande yahn Dihvo vo Jesucristo. Avane ne, te ye ntiyon nuhn che cah nuhn, cadino ihyan che a ndo yan ye nduco ye. ¹⁹Dendiohs ne, dechuh ye Dihvo vo Jesucristo, ne che cuande yahn ihyan min ndedevahn ye ihyan iyehñse, nchahco ye nunde yahn ye. Ndaconan rahn che te ye ntiyon nuhn che cah nuhn, cadino ihyan che ndo yan ye, nchahco ye nunde yahn ye.

²⁰Dechuh Dihvo vo Jesucristo nuhn, cahndudo nuhn van nchuhn menun Dendiohs, anduhneca ndete che a man ye riyahve ye nchuhn. Chemin che riyahve nuhn nchuhn che cuande yahn Dihvo vo Jesucristo, che ndaca ne che nchahco nunde Dendiohs, ndo yan ye nduco ne. ²¹Dihvo vo Jesucristo

ne, hua quendihco ye nde ama nunde, ate din Dendiohs che nedihve ye nunde yuhn vo, anduhneca ndete che man ye quendihco ye nunde. Tihca din ye cava che, nduco che cotahno vo Dihvo vo ne, ndaco vo vederenchahco, ne runecade cuahtenan vo nduhca che nahn ye.

6 ¹Nducote redin nuhn ntiyon yahn Dendiohs ne, riyahve nuhn nchuhn che hua duche rino ne vedeyahino yahn ye cava ne, ²te nan Ndudo yahn ye ne, rahn ye ri ye ihyan ndico yuhn vo tuhca:

Cuahn che nda ro ndah yahn nchuhn ne, chinan nchuhn, ndedevahn nchuhn.

Namin nchuhn ne, a ro cuh che ro ndah yahn ne, a ro cuh che ndevahn ne.

³Nuhn ne, runecade vatechica nuhn, cava che hua ndaca yune che ndahchenan ihyan ntiyon che redin nuhn. ⁴Nan nducuahn che redin nuhn ne, rihco ro nuhn che numa cuaco redin nuhn ntiyon yahn Dendiohs. Ama redin chahtino nuhn yahn nducuahn che rechuhrihn nuhn man, ⁵rahn ihyan nuhn man, rih ye nuhn vacoyahn man, rendo dama ye, redin canda ye nduco nuhn man, ama rechuhrihn nuhn che redin nuhn ntiyon man, hua ri che cuahteyado nuhn man, rih cuico nuhn man. Ate van nducuahn dehtenduh chemin chan ne, rihco ro nuhn che redin nuhn ntiyon yahn Dendiohs.

⁶Namin rihco ro nuhn che redin nuhn ntiyon yahn ye, yahn che runecade vatechica nuhn man, renahn nuhn ndudo yahn ye man, ama redin chahtino nuhn man, chenan cuma nuhn vedevahino man, quenun Vaco Ndah yahn ye nuhn man, numa cuaco redin yahino nuhn ihyan man, ⁷chenan cuma nuhn vederihquentiyon yahn ye man, rahndudo nuhn ndudo ndah yahn Dihvo vo Jesucristo man. Nduhca sandado che va che ruhn nduco se man, va che rendedevahn nduco se sahn man ne, tihca nuhn, te a ndo yan Dendiohs nduco nuhn, nedin yahn ye nuhn, ne hua dehva rinda yahn nuhn. ⁸Nahn ihyan ne, rendeva ye yavenan nuhn, ne nahn ye ne, rendahchenan ye nuhn. Nahn ihyan ne, ndah rahn ye yahn nuhn, ne nahn ye ne, chihnga rahn ye yahn nuhn. Nahn ihyan ne, rahn ye che rente nuhn ndudo cuaco, ne nahn ye ne, rahn ye che rihncheh nuhn. ⁹Nahn ihyan ne, yahino ye nuhn, ne nahn ye ne, nde hua retumacah ye nuhn. Nahn cuan ne, vate nuhn tah vederih

man, redin tan ihyan nduco nuhn man, ate rendedevahn Dendiohs nuhn. ¹⁰Andahre ran nuhn nahñ cuan, ate hua dehve rahco nuhn. Andahre chevah nuhn, ate anduhneca ndete che redin cuihca nuhn ihyan, ricuahn nuhn Ndudo yahn Dendiohs ihyan. Andahre metah dehva yahn nuhn muhn iyehñse cuh, ate rinan Dendiohs nuhn, ne hua dehva rinda yahn nuhn.

¹¹Nchuhn dihno nuhn che vate ne yan Corinto, numacuahn chedave yahn nuhn yahve nuhn nchuhn, hua chihco ndeh nuhn nde ama ndudo. ¹²Nuhn ne, yahino nuhn nchuhn, ate man nchuhn ne, ti nan ti ino ne rendihche ne nuhn. ¹³Nduhca che riyahve ihyan daya ye ne, tihca riyahve nchuhn, cava che din yahino ne nuhn nduhca che yahino man nuhn nchuhn.

***Uvo che ritahno vo Dihvo vo Jesucristo
ne, ihyan yahn Dendiohs uvo***

¹⁴Hua dama co nchuhn nduco ihyan che hua ritahno ye Dihvo vo Jesucristo, te hua redin yahn che ihyan che ndah ihyan ye ne, dama co ye nduco ihyan che duhtuno ihyan ye. Namin hua redin yahn che ihyan che a ntah ndutinan ye, renevahnecun ye Ndudo yahn Dendiohs ne, dama co ye nduco ihyan che hua renevahnecun ye. ¹⁵Dihvo vo Jesucristo ne, hua ri dama ndudo yahn ye nduco chundah. Namin ihyan che ritahno ye ihyan ne, hua ri dama ndudo yahn ye nduco ihyan che hua ritahno ye. ¹⁶Ihyan che rendeva ye yavenan Dendiohs ne, nde hua redin yahn che dama co ye nduco ihyan che rendeva ye yavenan dehtenduh che ndiyu Dendiohs. Dendiohs ne, quenduche ye, ne uvo ihyan yahn ye ne, anduhneca ndete che yaco yahn ye, nduhca che a ndirun nan Ndudo yahn ye tuhca:

Conun van ihyan yahn.

U che Dendiohs yahn ye.

¹⁷⁻¹⁸Namin ndirun:

Dihvo vo Dendiohs, ihyan min che quenán cuma ye nducuahn vederihquentiyon ne, rahn ye:

“Co din vi nchuhn yahn ihyan nunde, cuihcoman ne ihyan. Hua din ne dehtenduh che chihnga, cuahtendihco ne nunde.

Tuhme ndevá nchuhn, din yahn nchuhn, ndo ne dayá.”

7 ¹Dihnó che yahinó nchuhn, nducote tihcá nte Dendiohs ndudo yahn ye ne, nahn che cahcoman vo nunde yuhn vo, ne runecade cuahtechico vo, nevah necun vo ihyan.

Nto ino ihyan ndiyaco nunde yahn ye

²Cuenevah necun nchuhn nuhn. Hua nedin tan nuhn nduco nde ama ne. Hua nihnceh nuhn nchuhn. Nde ama nchuhn, hua ndinda ne cava nuhn. ³Che dirun tihca ne, ndiyu che rahn nundé yahn nchuhn, te yahino nuhn nchuhn nduhca che a rahn ri nchuhn menan, andahre va che coh nuhn cava ne. ⁴Ama rendaca vedechahtino man, ama yenó man, ama renecah yan chedave yahn man, cava ne. Andahre rechuhrih nuhn, ate ama yenó.

⁵Numacuahn ro che chahtechica nuhn yahn yahn Macedonia ne, nde tah hua chahtetuhno nuhn, te din tan ihyan nduco nuhn. Chuhrih nuhn, ne ama ndedecadino nuhn nan ntiyon che redin nuhn. ⁶Ate Dendiohs, ihyan min che renecah yan ye chedave yahn ihyan che ran ye ne, necah yan ye chedave yahn nuhn, yahn che nta Tito. ⁷Avane ne, nte cuande se nuhn nduhca che nevah necun nchuhn sahn man, necah yan ne chedave yahn se man, ama chi ran ne cava nunde yahn ne man, ama rendedecadino ne cava man, ne cava nducuahn chemin ne, nde tahque chi yenó.

⁸Cuahn che dirun yahn ne menan, din che chi ran ne ne, nde man nto ino che tihca din, ate man ne, yenó, te checadino che chichihve yahn ne, nto ino ne nunde yahn ne. ⁹Man ne, yenó, ndiyu yahn che din che chi ran ne, ate yahn che chichihve vederan yahn ne, din che nto ino ne nunde yahn ne. Hua ndere cah rihn nchuhn nduco che tihca dirun, te nto ino ne nunde yahn ne numacuahn vederan, nduhca che nahn Dendiohs. ¹⁰Chichihve yahn ne, te cuahn che numacuahn vederan rento ino vo nunde yuhn vo ne, rendedevahn Dendiohs uvo. Ate vederan che ametah co quendi vo vedeyeno yahn man vo, cuahtendihco vo nunde ne, nde hua cochihve. ¹¹Condihe nchuhn nduhca che chichihve che nto ino ne nunde yahn ne nduhca che nahn Dendiohs. Chi yudo yahn ne yahn nunde yahn sahn min, nde dihya ne chi. Runecade tumacah ne yahn, ne ndaca ne che nchahco nunde che hua tumacah ne yahn menan. Namin necahco ne u cava

che conán nchuhn. Din ne castigo sahn, ne nan nducuahñ chemin ne, chihnde ro yahn ne che dave yavenan ne yahn nunde min. ¹²Che dirún yahn nchuhn menan ne, che nahn che tumacadino ne nan Dendiohs nduhca che nevahñecun ne nuhn. Che dirún yahn ne ne, menan vihca a cava nchuhn che ndedecadinó, ndiyu deman yahn sahn min che quendihco se nunde, nde huane yahn ihyan che din duche yahn se ihyan. ¹³Nducote nto ino nchuhn nunde yahn ne ne, chemin che chi yeno nuhn.

Avane ne, nducote ndihchero nuhn che ama yeno Tito yahn che necah yan nducoyaca nchuhn chedave yahn se ne, chemin che nde tahque chi yeno nuhn. ¹⁴Hua quendah cuihno u che rahn ri sahn che ndah ihyan nchuhn. Nduhca che riquendah cuaco nducuahñ che renté nduco ne ne, tihca quendah cuaco nducuahñ che rahn ri sahn yahn ne. ¹⁵Me Tito ne, nde tahque yahino se nchuhn man ro cuh, che co ro che quenán se yan vaco ne, te reñecahco se nduhca che nevahñecun ne sahn nduco vedino vedeneñcun, dinahn ne che chihquentiyon se. ¹⁶Me u ne, ama yenó, te a devaná che reñevahñecun nchuhn nducuahñ che rihquentiyón.

Nduhca che nahn che cah vo vedino

8 ¹Dihno nuhn, man ne, nte cuande nuhn nchuhn nduhca che din yahino Dendiohs ihyan yahn ye che vate ye yahñ yahn Macedonia, chinan ye ihyan cava che tuno tah ye che cah ye vedino. ²Ihyan chahn ne, andahre ama rechuhrihn ye che redin tan ihyan nduco ye man, ama chevah ye man, ate ama yeno ye, ne numacuahn chedave yahn ye cah ndahva ye vedino. ³Man ndihcheró che numacuahn vedeyeno cah ye nde tahque ndahva ca che co che retumacadino vo che co cah ye. ⁴Ama chica ye favor nuhn, che cah yune nuhn che condá van nduco ye, conan ye dihno vo. ⁵Nde hua ndedecadino nuhn che tihca din ye, ate nde tahque quendahnñan ye, te che tahque ndah ne, chihco ye chedave yahn ye nduhca che nahn Dendiohs, cava che dinahn ye nducuahñ che rihquentiyon Dihvo vo Jesucristo man, cava che nevahñecun ye nuhn man. ⁶Nducote tihca din ihyan chahn ne, chemin che cah cuande nuhn Tito che ndaconan se yan vaco nchuhn, quendi se din dama se vedino min. ⁷Nducote ama chenán cuma ne vederihquentiyon che

cotahno ne mān, che cuahndudo ne mān, che devano ne mān, checo checunde chenān ne nān ntiyon yahn Dendiohs mān, yahino ne nuhn mān ne, chemin che ndāhca che din nun ino ne, cuahtenan cuma ne vedevahino.

⁸Ndiyu che rihquentiyón nchuhn, ate ráhn nduco ne cava che cadino ne nduhca che chenān cuma dihno vo chenahn vedevahino mān, cava che cuhnde ro ndete che numa cuāco chenān cuma ne vedeyahino mān. ⁹A devano nchuhn nduhca che ama yahino Dihvo vo Jesucristo uvo, ne nahn che quendi ne yune yahn ye. Nduhca ama ihyan cuihca che ndo chevah ye, yahn che din ye vedevahino ne, tihca ihyan min, te andahre ama yudo vederihquentiyon yahn ye, ate nducote yahino ye uvo ne, chihcomān ye nducuahn, nda ye muhn iyehse cuh cava che ndedevahn ye uvo.

¹⁰Tihca riyahvé nchuhn cava che ndah yahn ne, te a mān nchuhn chihndeyān chedave yahn ne nde nduyo chuh me, canān recah ne vedino min. ¹¹Mān ne, nduhca che nduco vedeyeno canān cah ne, tihca nahn che quendi ne dinahn ne tunoca che tuno tah ne, nde conan cah ne. ¹²Tihca, te vedino che recah vo ne, a devano Dendiohs nduhva che co cah vo. Cuahn che recah vo numacuahn chedave yuhn vo ne, renevahnecun ye.

¹³Che cah nchuhn vedino min dihno vo ne, ndiyu che cah ne nde ndo chevah mān ne. ¹⁴Che nahn ne, che conan ne ihyan cava che ndaca che chuhnun ye mān ro cuh. Nda ro che va vederetahn yahn mān ne ne, tihca conan ihyan chahn nchuhn. Nduco tihca ne, ndaca che chuhnun ama tama ne cuahn dama. ¹⁵Va ama ejemplo yahn chemin che ndirun nān Ndudo yahn Dendiohs tuhca: “Ihyan che ndeh din dama ye ne, hua ngava yahn ye, ne ihyan che doh din dama ye ne, hua chicuah nan yahn ye.”

Tito nduco combiero yahn se ne, ndaconan se yan Corinto

¹⁶Nundihve cuahn Dendiohs che cahñ nun ye chete chedave yahn Tito, che namin rendedecadino se cava che ndah yahn nchuhn nduhca che rendedecadinó. ¹⁷Ndetahno nevahncun se che yahvé sahn che chi se. Avane ne, nducote a mān se ndihco se che chi se ne, cochi se quendihchero se nchuhn numacuahn vedeyeno.

¹⁸Dechuh nuhn dama nduco se ama dihno vo che ama ndah rahn ihyan yahn ye nduh cuan yaco, yahn che ama quendah ndah ye che rahndudo ye ndudo ndah yahn Dihvo vo Jesucristo. ¹⁹Avane ne, a tendahnun ihyan ndiyaco dihno vo min, che conduco ye nuhn nan che vatechica nuhn. Quenan conan ye nuhn, din dama nuhn vedino che a ndanan redin dama nuhn, cava che ndeva ihyan yavenan Dihvo vo man, cava che cahco ro nuhn vedeyahino yahn nchuhn man.

²⁰Nducote hua nahn nuhn che ndere cahma nde ama ihyan che toh man nuhn vedino min ne, chemin che yahve nuhn ihyan ndiyaco che tendahnun ye ama cha dihno vo, cava che conduco ye nuhn. ²¹Tihca, te nahn nuhn che dave yavenan nuhn nan Dendiohs man, nan nducoyaca ihyan man.

²²Avane ne, dechuh nuhn tama dihno vo nduco Tito. Dihno vo min ne, a rendihche nuhn ihyan che runecade ye cuahn dama nan nducuahn ntiyon yahn Dendiohs. Ihyan min ne, quenan ino ye che conahn ntiyon che chi ye, te a rendihche ndah ye nchuhn. ²³Te cuande nchuhn te Tito ne, rinduco se u nan ntiyon che quenan, cochi se, conan se nchuhn menun. Me dihno vo chenahn ne, ihyan ndiyaco dechuh ye ihyan. Ihyan chahn ne, nducote runecade ye ne, cuhnde ro che ama yudo vederihquentiyon yahn Dihvo vo Jesucristo. ²⁴Man ne, cuinan nchuhn ihyan chahn, cava che cadino ihyan ndiyaco chenahn nduhca che chenan cuma ne vedeyahino man, cava che hua co cuihnan nuhn che rendeva nuhn yavenan ne man.

Vedino cava dihno vo

9 ¹Yahn vedino che redin dama nuhn cava dihno vo ne, rahco che nde hua rendotenan che dirun yahn ne, ²te a rendihche nchuhn che ama cuno ino ne. Chemin che hua cuihnan rente nduco dihno vo che vate ye yahn yahn Macedonia, yahn nchuhn che vate ne yahn yahn Acaya, che a vateyan ne nde nduyo chuh cava che conan ne. Nducote checadino ye che redin nun ino ne recah ne vedino min ne, a nahn nducoyaca ye ama cah yeno ino ye, canan recah ye. ³Andahre tihca ne, dechuh dihno vo chahn tan, cava che cuahteyan niyon nchuhn nduhca che a rente yahn ne, ne hua quendah cuihno che rendonan nchuhn. ⁴Tihca din, te cuahn che chi ne, denan conduco ama o dihno vo che vate ye yahn

yahn Macedonia u, ne nahn che a vateyañ nchuhn. Ndete che hua ne, quendañ cuihno nchuhn. Namin quendañ cuihno nuhn che ama rendonan nuhn nchuhn. ⁵Nducote hua náhn che quendañ cuihno uvo ne, yahvé dihno vo chahn che chi ye, conan ye nchuhn, din dama nduh ne vedino min che a ndihco ne chedave yahn ne che cah ne. Nduco tihca ne, cuahn che nda nuhn ne, hua quenana cuma nuhn che comañ caça nuhn nchuhn.

⁶A devano nchuhn te cuahn che ndahva ndute ndata rihno vo ne, ndahva renevahn vo, ne cuahn che doh rihno vo ne, doh renevahn vo. ⁷Atihnocano che recañ vo vedino. Nahn che cah vo nduhva che ndihco vo che cah vo. Nahn che cah vo numacuahn chedave yuhn vo, hua nduco fuerza, te Dendiohs ne, yahino ye ihyan che nduco vedeyeno recañ ye. ⁸Dendiohs ne, va vederihquentiyon yahn ye che conan ye nchuhn nan nducuahn, cava che hua dehva conda yahn man ne man, cava che va ndahva yahn ne che conan ne ihyan chenhahn man. ⁹Tihca, te nan Ndudo yahn Dendiohs ne, a ndirun tuhca:

Ihyan che redin ye vedevahino nduco ihyan chevah ne, rihan Dendiohs ihyan cuahn dama, ne hua ri doh dehtenduh yahn ye.

¹⁰A Dendiohs che recañ ye ndute ndata che rihno ihyan man, rihquechey ye ihyan man. A ihyan min che din ye che co ndeh ndute ndata yahn nchuhn man, tihdenan ye vedevahino yahn ne man, ¹¹cava che co chahte nducuahn ntiyon yahn ne, conan ne ihyan chevah numacuahn chedave yahn ne. Nduco tihca ne, ndeva ihyan yavenan Dendiohs yahn ntiyon che redin nuhn van nchuhn. ¹²Tihca, te vedino che vatechica nuhn redin dama nuhn ne, din che ndaca che chuñun dihno vo man, nde din che ndeva ihyan yavenan Dendiohs man. ¹³Ihyan che ndondañ tah ye vedino min ne, ndeva ye yavenan Dendiohs, ndiyu demañ yahn che ama rihan nchuhn ihyan man, ihyan chenhahn man, ate yahn che renevahnecon ne ndudo ndah yahn Dihvo vo Jesucristo. ¹⁴Namin covah ye cava nchuhn numacuahn chedave yahn ye yahn che tihyon yune Dendiohs nchuhn che din ne vedevahino nduco ye. ¹⁵Nundihve cuahn Dendiohs che ama chahte vedevahino yahn ye cavo vo, che nde hua retumacardino man vo, dechuh ye Dihvo vo Jesucristo, ndedevahn ye uvo.

Vederihquentiyon che quenán cuma Pablo

10 ¹U Pablo, riyahvé nchuhn numacuahn vedino vedeneacun nduhcá che nahn Dihvo vo Jesucristo. Nahn nchuhn ne, rahn ne yáhn che ama tán cuahn che yahn quenán, ne cuahn che quenún van nchuhn ne, ama necún. ²Ate riyahvé nchuhn che hua dín ne che ndaca yune che dín castigo nchuhn cuahn che ndá, te va inó che dín castigo ihyan che rahn ye che vatechica nuhn vedeyeno yahn man nuhn. ³Cuaco te ihyan iyehñse nuhn, ate redin nuhn ntiyon yahn Dendiohs nduhcá che nahn ye, ndiyu nduhcá che nahn man nuhn. ⁴Nduhcá sandado che chenán cuma se dehtenduh che richihve yahn se nan che ruhn se ne, tihcá chenán cuma nuhn vederihquentiyon chahte. Vederihquentiyon min ne, ndiyu yahn ihyan iyehñse, te yahn Dendiohs, ne co ndahco ndiya ihyan che duhtuno ihyan ye. ⁵Namin ndahco ndiya nuhn ihyan, che numacuahn vedeyade man, vededevano yahn man ye man, rahcotahn ye yahn Dendiohs, ne ndahco nuhn ihyan tah Dihvo vo Jesucristo, cava che dinahn ye yahn ye. ⁶Cuahn che a ndahcá redinahn nchuhn ne, nuhn ne, vate nuhn cava che din nuhn castigo ihyan che rahcotahn ye.

⁷Nchuhn ne, rihco ne cudado nde nan ran nde nan rica nuhn, ate hua rendihche ne tacá chedave yahn nuhn. Ndete che devano cuaco ne che a yahn Dihvo vo Jesucristo nchuhn ne, cuedevano ne te namin nuhn ne, a yahn ye nuhn. ⁸Te Dihvo vo Jesucristo vederihquentiyon nuhn, ndiyu cava che din nuhn che conda nchuhn, ate cava che conan nuhn nchuhn che cotahno ne ihyan numa ino ne. Chemin che, andahre ama rendonán vederihquentiyon min ne, hua ri cuihnán. ⁹Tihcá rahn rí nchuhn cava che hua ndedecadino ne che ndere renahn dihyá nchuhn nduco caca che redechúh yahn ne. ¹⁰Hua náhn che namin nchuhn tihcá ndedecadino ne, te nahn ihyan ne, rahn ye te ama renan inó che cayá ihyan nan caca che redechúh yahn ye, ate cuahn che quenún van ye ne, hua dito nan nde hua ndahchan ndudo yáhn. ¹¹Ihyan che tihcá rahn ye ne, codevano ye te nduhcá che yudo rihquentiyon nuhn cuahn che yahn chenán nuhn, redirun nuhn yahn ne ne, atihnocá yudo cahcantiyon nuhn cuahn che ndá nuhn van ne.

¹²Hua rendeva man nuhn yavenan nuhn nduhcá che redin nahn ihyan che rendonan man ye ihyan, te ama vedetundo

che redin ye, rendeva man ye yavenan ye, rahco ye che tahque rignonun chihve ye che co ihyan chenahn. ¹³Nuhn ne, hua redin yade nuhn, rechuhnan nuhn vederihquentiyon che te Dendiohs nuhn, che din nuhn ntiyon yahn ye van nchuhn. ¹⁴Nuhn che nda nuhn menan ndita, cahndudo nuhn ndudo ndah yahn Dihvo vo Jesucristo, chihnevan nchuhn, ne chemin che redin yahn che quendi nuhn cahcantiyon nuhn nchuhn. Che tihca redin nuhn ne, hua rechuhnan nuhn vederihquentiyon che chenana cuma nuhn. ¹⁵Hua redin yade nuhn, rihquentiyon nuhn nan che nedin tama ca ihyan ntiyon. Che cuaco ne, chenana ino nuhn che cotahno nchuhn Dihvo vo Jesucristo numa ino ne, cava che co chahte ntiyon che redin nuhn van nchuhn, ne quendi nuhn nduhca che a cochi nuhn rihquentiyon nuhn. ¹⁶Tuhme quendi nuhn cuacotuhn nuhn ndudo ndah yahn Dihvo vo Jesucristo yan chenana, ate hua cahnevi nuhn ntiyon che nedin tama ca ihyan.

¹⁷Duh nchuhn che nahn ndonan man ne nchuhn ne, tahque ndah che ndonan ne Dihvo vo Jesucristo, ¹⁸te ihyan che rendonan man ye ihyan ne, hua cochihve yahn ye che tihca redin ye. Me ihyan che rendonan Dihvo vo Jesucristo ihyan ne, atenan ihyan chahn che rendeva Dendiohs ihyan.

Sahn che redin ca se che apóstol se

11 ¹Ama ndahca ndete che din chahtino nchuhn che ndonan vederihquentiyon che quenana cuma. Co rahco ne che ama vedetundo che tihca redin. ²Ate hua, te ama yahino nchuhn nduhca che nahn Dendiohs, cahndudo ndudo ndah yahn Dihvo vo Jesucristo, chitahno ne, ne nahn che dave chedave yahn ne, nda ne nan ye. ³Nducote chundah ne, ama mayon se ne, ndo se cu, chihncheh se Eva. Namin nchuhn ne, vahino cava ne, te denan hua numa ino ne ritahno ne Dihvo vo Jesucristo, ne cah yune ne che cahnceh se nchuhn, cuacondah vedame ne ihyan. ⁴Vahino cava nchuhn, te denan nda sahn che cacuahn se tama ndudo menun ndudo yahn Dihvo vo Jesucristo man, cuahndudo se tama ndudo, redin vahn se che ndudo ndah yahn Dendiohs man, conun se nchuhn che nevahnecon ne tama vaco menun Vaco Ndah yahn Dendiohs man, ne a ndah no ino ne cotahno ne nducuahn. ⁵Rica nchuhn che din chahtino ne yahn, nan

sahn chahn che redin vahn ne apóstol ndah, te nde tah hua rinda nan yahn vederihquentiyon che quenán cumá nan vederihquentiyon yahn se. ⁶Andahre hua ndahchan ndudo yáhn nan che rahndudó, ate nan vederihquentiyon yahn Dihvo vo Jesucristo ne, a devanó ndendi ndendita nduhca che a rendihche man nchuhn.

⁷Hua dehve ama nunde che din man ntiyon, ndaca che chuhnún cuahn che cahndudó ndudo ndah yahn Dendiohs, chihnevan nchuhn. Tahque ndah ne, quendaḥ vedechahtinó chuhríhn cava che ndah yahn ne. ⁸Cuahn che quenán van nchuhn, dín ntiyon yahn Dendiohs cava che ndah yahn ne ne, dihno vo che vate ye tama yan chinan ye u cava che ndaca che chuhnún, ate anduhneca che ndere chehneví yahn ye, te ndiyu ihyan chahn va che conan ye u ro min. ⁹Cuahn che chicuah nan yáhn ne, nde ama nchuhn hua dendúh nchuhn. Tahque ndah ne, ama o dihno vo che chica ye yahn yahn Macedonia, chinan ye u. Nduco tihca ne, hua dendúh nchuhn ro min. Atihnocá hua dendúh nchuhn caviyan deman. ¹⁰Nde muhn nde nan Dihvo vo Jesucristo, cuaco ráhn rí nchuhn chemin. Numachahte yahn yahn Acaya, hua quendaḥ cuihnó nan nde ama ihyan, yahn che tihca ráhn. ¹¹Ndiyu che hua yahinó nchuhn che hua náhn che conan ne u. A man Dendiohs devano ye che ama yahinó nchuhn.

¹²Quendí dín tihca cava che co cuihnan sahn yade chahn che vatechica se redin ca se che apóstol se, redin ca se che redin se ntiyon nduhca che redin nuhn. ¹³Sahn chahn ne, ndere vatechica se, rihncheh se ihyan, redin ca se che apóstol yahn Dihvo vo Jesucristo sahn. ¹⁴Hua cahn ino nchuhn che redin ca se che apóstol se, te a devano vo te namin chundah ne, rendedeche se sahn, co ndaconda se nde ama ángel diyahn ndete che nahn se. ¹⁵Chemin che nde hua cahn ino nchuhn, ndihchero ne sahn chahn che redin se ntiyon yahn se, redin ca se che ndudo ndah yahn Dendiohs che rahndudo se. Yahn nducuahn che redin se ne, va che din Dendiohs castigo sahn, nedihve se nunde yahn se.

Nduhca che rechuhrihn Pablo nan ntiyon yahn Dendiohs

¹⁶Ndaconan ráhn rí nchuhn che hua ndedecadino ne che ama vedetundo che náhn ndeva man yavenán. Ndete che

tihca ndedecadino ne ne, codin chahtino ne yahn. ¹⁷Che rahn ri nchuhn che nahn ndeva man yavenan ne, ndiyu Dihvo vo Jesucristo che tihca rihquentiyon ye, te chemin ne, vedetundo yahn man. ¹⁸Nducote ama yahn sahn che redin yade se che ama ndah ihyan se ne, namin u ne, ndeva man yavenan. ¹⁹Tihca din, te nchuhn ne, ama devano ne che rahco ne, nde hua ri cuihnan ne, a ndah no ino ne retuma ino ne sahn che rendeva man se yavenan se. ²⁰Andahre redin se decahya yahn se nchuhn man, rendinun rendinahno se nchuhn man, redin yahn se dehtenduh yahn ne man, rinan se yahn nchuhn man, rahn se vaconan ne man, ate a ndah no ino ne. ²¹Anduhneca ndete che ama vedecuihno chemin cavá, te nuhn ne, hua rihquino nuhn che ndere din nuhn nduco nchuhn.

Andahre ama vedetundo, ate namin u ne, co din yade nduhca che redin sahn chahn. ²²Ndete che redin yade se che sahn nación yahn Israel sahn ne, namin u ne, ihyan nación yahn Israel u. Ndete yahn che rente se devaco hebreo ne, namin u ne, rente devaco min. Ndete yahn che ndata yahn Abraham sahn ne, namin u ne, ndata yahn ye u. ²³Ndete nan ntiyon yahn Dihvo vo Jesucristo nahn din yade se ne, namin u co din ama vedetundo, ndo yade, te tahque ndichihve u nan ntiyon yahn ye man, tahque nedin ntiyon yahn ye man, tahque ndeh yune nenun vacoyahn man. Ama ndeh yune nahn ihyan u man, ama ndeh yune adeche cahno ihyan u man. ²⁴Sahn nación yahn Israel ne, uhn yune din se castigo u, chahn se ndico ntiyon cun cuarta u. ²⁵Ino yune chahn se yahn u. Ama yune ndo dama ihyan, cah ye tu u nde a chihno ye u, che rahco ye. Numacuahn ro che quechica nan ntiyon yahn Dihvo vo Jesucristo ne, ino yune cheche nun barco nan che quenun, ama ro ama yan quenun van nuniyahn. ²⁶Ama chuhrin nduh cuan nan che quechica yahn ntiyon che quenán. Ama ndeh yune adeche quenda ico u. Nduh cuan nan che quechica ne, ama cahnda, yahn che ama vate sahn duco. Ama ndeh yune cuahto din tan ihyan nación yahn man, ihyan nación chenahn man, nducó, adeche cahno ye u. Adecotino che quechica, viyan man, viyata man, nuniyahn man, ama chuhrin, adeche coh nah cuan. Me sahn che redin ca se che ritahno se Dihvo vo Jesucristo ne, cuahn dama chenun ino se vedetan, nahn cahno se u. ²⁷Ama chi cunó nan ntiyon man,

ama quenduché man, ama chih cuicó man, chih yacá man. Nahn cuan ne, adeche coh iché, quechicá van ngo, nde tino yáhn metah.

²⁸Avane yahn nducuahn chemin chan ne, ama rendedecadinó ro ro, cava nducoyaca ihyan che ritahno ye Dihvo vo Jesucristo, te u che redín cudado ihyan. ²⁹Nducoyaca dihno vo che hua ndah richahtino ye Dihvo vo ne, ama rendedecadinó cava ye. Namin nducoyaca dihno vo che redin ihyan che rahtendihco ye nunde ne, ama ri ran cava ye. ³⁰Ndete che nahn co yenó ne, tahque ndah che co yenó yahn dehtenduh che rihco ro che hua rignonun chihvé. ³¹Dendiohs, Chida Dihvo vo Jesucristo, ihyan min che rendeva vo yavenan ye cuahn dama ne, devano ye te cuaco che rahn. ³²Cuahn che quenán yan Damasco ne, gobernador che rinan se rey Aretas, va se yan min, ne chih se sandado yune che nahn din se preso u. ³³Ate ndedevah ihyan u chete ama cuahte cuahn vedame chete che ndacoriya chihto yan me, ne nduco tihca cahn.

Ama vederihno che cah Dihvo vo Jesucristo, ndihchero Pablo

12 ¹Hua redin yahn che ndeva man yavenan, ate va che có nchuhn yahn ama vederihno che te Dihvo vo Jesucristo, ndihcheró. ²⁻³A ndeh nduyo che ritahnó Dihvo vo Jesucristo, ne man adive ne, a ri ndiche cun nduyo ne, quenda ye u vahchetero. Hua devanó, a man, o vacó, atenan Dendiohs devano ye. Ate tanoca nduh ne, quenda ye u vahchetero. ⁴Min chihneván ama ndeh ndudo che nde hua rentaquinó deh che cahmá yahn. Avane ne, cahnda va che cahmá. ⁵Vederihno min che cuaco, redin yahn che ndonán. Ate cava man ne, nde hua redin yahn che ndo yadé. Atenan yahn che nde hua rignonun chihvé, atenan yahn chemin che co co yenó. ⁶Ndete che nahn ndo yadé ne, dehve ndere ndo yadé, te ndudo cuaco che cahmá. Ate tahque ndah che nde hua cahmá yahn, cava che hua cava chemin nevahnecon ihyan u, te atenan che cahnevan ye che renté man, cahco ye cudado nduhca che quechicá man.

⁷Cava che hua ama din yadé che ndihcheró vederihno min ne, cah yune Dendiohs che dechuh chundah ama cah tan, chetah u, redin che rechuhrín cuahn dama. ⁸A ino yune ama chicá favor Dihvo vo Jesucristo che cahnevi ye cah min,

⁹ate rahn ye ri ye u te nduco che yahino ye u, a va, te tahque rihco ro ye vederihquentiyon yahn ye nduco ihyan che nde hua rignonun chihve ye. Chemin che ama yenó che rechuhríhn, redin cah, te nduco tihcá ne, tahque rihco ro Dihvo vo vederihquentiyon yahn ye nducó. ¹⁰Ri yenó yahn nducuahñ che rechuhríhn nan ntiyon yahn Dihvo vo, che ndere riya ihyan u man, che redin tan ye nducó man, che hua rendaça che rechuhnún man, che yah rahnó man, te cuahn che rendó nde ndiyahn ne, tahque rihco ro Dihvo vo vederihquentiyon yahn ye nducó.

***Pablo ne, ama rendedecadino ye cava ihyan
yahn Dendiohs che vate ye yan Corinto***

¹¹Ama vedetundo che rahn yadé nduco nchuhn, ate nducote retuma ino ne sahn che rihñcheh se nchuhn ne, quenán cuma che tihcá dín. Nchuhn che redin yahn che ndeva ne yavenán, ndiyu man, te andahre lado yáhn nde hua rignonun chihvé, ate hua dehva rinda nan yáhn nan sahn apóstol chemin chan, che rahco ne che ama ndah se. ¹²Cuahn che quenán van nchuhn ne, nduco rino nduco ndah dín vederihno, chihnde ro che apóstol numa cuaco u. ¹³Nchuhn ne, dama no din yahinó nchuhn nduco dihno vo che vate ye tama yan. Ate ndete che rahco ne che quendihcó nunde yahn che hua dendúh nchuhn che ndaça che chuhnún ne, codin chahtino ne yáhn.

¹⁴Ráhn rí nchuhn te a rihcoyan yáhn che ndaconan chí quendiheró nchuhn co ino yune. Nde hua dendúh nchuhn, te rechí cava che ndah yahn ne, ndiyu cava che nahn co yáhn dehtenduh che va yahn ne. Tihcá, te redín nduhcá che redin ihyan che rihcacheh ye daya ye. Ndiyu man ye chenán ino ye che cahcacheh daya ye ihyan. ¹⁵Andahre cuahn che tahque yahinó nchuhn, ra tin ne, ne ti nan ti ino ne rendihchero ne u, ate nde nduco nduh ne, vá vedeyeno che quendí conán nchuhn, nde vá vedeyeno che cahco mendáhn u cava che ndah yahn ne.

¹⁶Andahre devano cuaco nducoyaca nchuhn che hua dendúh nchuhn cava che ndaça che chuhnún, ate nde nduco nduh ama o ne ne, renuhn ino ne, rahn ne che nducote ama mayon u ne, chihñchéh nchuhn. ¹⁷Namin a devano nchuhn che ndiyu che chihñchéh nchuhn che dechúh ama o dihno vo,

chendihero ye nchuhn. ¹⁸A dechúh Tito nduco t̄ama dihno vo, chendihero se nchuhn, ne a devano ne te hua chihnech se nchuhn. Namin a devano ne te nde ̄ama nuhn hua nihnech nuhn nchuhn, te d̄ama vederendedecadino yahn nuhn m̄an, runec̄ade vatechica nuhn m̄an.

¹⁹Dihno che yahino nchuhn, che tihc̄a dirún yahn ne ne, co rahco ne che rahn nán m̄an nuhn. Ate hua, te nde muhn nde nan Dendiohs, nducuah che redin nuhn ne, redin nuhn numacuah vederihquentiyon yahn Dihvo vo Jesucristo, c̄ava che tahque numa ino ne cotahno ne ihyan. ²⁰Tihc̄a dín, te nahn che runec̄ade chenán nchuhn cuahn che nd̄a, c̄ava che co yenó c̄ava ne, ne hua nd̄aca yune che dín castigo nchuhn, co rán. V̄ahino c̄ava nchuhn, te denán cuahn che nd̄a, nt̄ac̄a nchuhn che vate c̄anda ne m̄an, redin ve ne yahn vih m̄an, t̄an ne nduco vih m̄an, redin ȳade ne m̄an, redin vi ne m̄an, retumac̄ah ne cuando nduco vih m̄an, rih nunde ̄ama t̄ama ne yahn vih m̄an, ndeh cuan ndi ne nduco vih m̄an. ²¹Namin v̄ahino, te denán cuahn che dechuh tun Dendiohs u van nchuhn ne, co cuihnán c̄ava ne. Co nde va che cuacó c̄ava ̄ama yahn nchuhn che metah nto ino ne nunde che chenán cuma ne nde ro menán, metah c̄ahcoman ne che chihnga redin ne m̄an, che ndere rahtenan ne nduco ihyan che hua nihnev̄aco ne nduco ye m̄an, che ̄ama idiha ne m̄an.

Rahn Pablo che cahn tun ye yan Corinto

13 ¹M̄an co ino yune che ndaconan chí quendiheró nchuhn. Nducoȳaca ne che va nunde yahn ne ne, dinoca nd̄ahco cūaco o ino ihyan, tuhme co ne castigo. ²Cuahn che nd̄a chí o yune ne, a rahn nduco nchuhn te cuahn che chí t̄ama yune ne, dín castigo nducoȳaca nchuhn che a chendihero ne nunde nde a rahn me, nde nducoȳaca nchuhn che cade rahtendihero ne nunde. M̄an ndaconan dirún yahn ne che a rahn c̄ava che hua conán ne. ³Nducote nahn nchuhn che c̄ahco ró che quenán nan ntiyon yahn Dihvo vo Jesucristo ne, cuahn che nd̄a t̄an ne, tumacadino ne. Dihvo vo Jesucristo ne, hua dehve vah ye nchuhn, te yudo vederihquentiyon yahn ye. ⁴Andahre quenán yah ye nan cruz, chih ye nduhc̄a ̄ama ihyan che nde hua rignonun chihve ye, ate ndedetuhche Dendiohs ihyan, nd̄ahco ye vederihquentiyon t̄ah ye. Atihno

nuhn, andahre r̄ahco ihyan che nde hua rignonun chihve nuhn, ate ritahno nuhn ihyan min, ne chemin che te Dendiohs vederihquentiyon, chenán cuma nuhn çava che ndah yahn ne.

⁵Cuendedecadino nchuhn çava man ne, a ritahno ne Dihvo vo Jesucristo, o hua. Ndete che numa cuaco ritahno ne ihyan ne, quenun Vaco Ndah yahn ye nchuhn, ne ndete che hua ne, hua. ⁶Quenan inó che codevano nchuhn te nuhn ne, ritahno nuhn ihyan min numa cuaco, quenun Vaco Ndah yahn ye nuhn. ⁷Rica nuhn Dendiohs çava nchuhn che hua cuahtendihco ne nunde, ne hua conan cuma che din nuhn castigo nchuhn, cuhnde ro che quenun Vaco Ndah yahn ye nuhn. Andahre ndahchenan ihyan nuhn, çahma ye che hua quenun Vaco Ndah yahn ye nuhn, ate tihçá redin nuhn, te tahque nahn nuhn che runecade cuahtechica ne, che co che quendáh yavenan nuhn. ⁸Tihçá, te nuhn ne, ndotenan che çahca tan nuhn yahn ihyan che redinahn ye Ndudo yahn Dendiohs ne, va che ndeva nuhn yavenan ye. ⁹Vedeyeno yahn nuhn ne, che cotahno nchuhn Dihvo vo Jesucristo numa ino ne. Dehve din yahn che ndahchenan ihyan nuhn. Namin revah nuhn çava ne, che nde tahque numa ino ne cotahno ne ihyan. ¹⁰Chemin che numanahn che ametah chí ne, dirún çaca cuh, dechúh yahn ne, çava che nto ino ne nunde yahn ne, ne hua conan cuma che dín castigo nchuhn cuahn che ndá tan. Tihçá, te hua náhn che vederihquentiyon che te Dihvo vo Jesucristo u, cochihve deman çava che dín castigo nchuhn. Tahque ndah ne, náhn che cochihve çava che quendi cotahno ne ihyan numa ino ne.

¹¹Dihnó, man ne, Dendiohs conduco ye nchuhn. Runecade cuahtenan ne man, cuenecah yan ama tama ne chedave yahn vih man, ama no ndudo codin ne nduco vih man, ndahca cuahtenan ne nduco vih man, ne Dendiohs, ihyan min che yahino ye uvo man, redin ye che rahte dihn chedave yuhn vo man ne, conduco ye nchuhn. ¹²Cuenecah ama tama ne Dendiohs vih numacuahn vedino vedenecon. ¹³Cuendeva ne Dendiohs yahn nducoyaca dihno vo che vate ye muhn.

¹⁴Dendiohs man, Dihvo vo Jesucristo man, din yahino ye nchuhn. Conun Vaco Ndah yahn Dendiohs nchuhn. Tihçá co.